

Til
Kulturdepartementet

HØYRINGSUTTALE FRÅ REPRESENTANTAR FRÅ MIDTGULEN, RUGSUND OG ÅLFOTEN SOKNERÅD om Staten og Den norske kirke – et tydelig skille.

Sokneråda takkar for tilsendt høyringsnotat, men vi synest høyringsfristen er kort, og vi har ikkje fått drøfta saksinnhaldet godt nok.

Vi merkar oss at Høyringsnotatet følger opp tidlegare politiske vedtak og Kyrkjemøtevedtak om eit tydeleg skilje mellom stat og kyrkje, og at det skal skje i høgt tempo, men likevel skrittvis. Vi gler oss over at statsråden understrekar at folkekyrkja ikkje skal svekkast ved eit slikt tydeleg skilje, men at det er den same kyrkja som skal vidareførast og kunne vere ei folkekyrkje for alle. Då er det viktig at Den norske kyrkje kan få så gode rammevilkår at kyrkja kan få den rekrutteringa som trengst for at ho kan vere ei kyrkje som kan nå ut til alle både i by og bygd.

Med dette som grunnlag vil vi kommentere nokre punkt:

1. Vi seier oss samde i at Den norske kyrkja vert eit eige nasjonalt rettssubjekt med sjølvstendig rettsleg handleevne. Det er naturleg, som departementet foreslår, at det er Kyrkjemøtet som opptre på vegne av det nye rettssubjektet, med opning for å delegere mynde til kyrkja sine nasjonale og regionale organ (t.d. bispemøtet, bispedømeråda, biskopane, prostane). Kyrkjerådet vil då vere det utøvande organet for rettssubjektet Kyrkjemøtet og ha ein slags styringsfunksjon.

Det er òg viktig for oss å understreke det høyringsnotatet seier om at sokna framleis skal vere grunneininga i Den norske kyrkja, sjølvstendige rettssubjekt, ha sjølvstendig økonomi og vere uløseleg knytt til Den norske kyrkja. Med andre ord: Sokna sitt rettslege sjølvstende må ikkje verte svekka på kostnad av eit nasjonalt rettssubjekt. Det er på grunnplanet, i møte med folket, kyrkja skal vere nær! Den faglege kompetansen i leiinga av kyrkja må vere god.

2. Når Den norske kyrkje har fått sitt sjølvstende som rettssubjekt, kan ein legge opp til ei verksemdoverdraging frå stat til Den norske kyrkja. Vi støttar at staten sitt arbeidsgjevaransvar for sine kyrkjelege tilsette (biskopar, prestane, tilsette ved Kyrkjeråd og bispedømeråd) vert overført til Den norske kyrkja, og at Den norske kyrkja bør førast inn under den alminnelege arbeidsrettslege lovgjevinga. Vi støttar og framleggjet om at Kyrkjemøtet skal kunne gje mynde til ein arbeidsgjevarorganisasjon til å opptre på sine vegne. Jfr framlegg til Kyrkjelova §24: *Kirkemøtet kan gi en arbeidsgiverorganisasjon fullmakt til å inngå og si opp tariffavtale, samt gi eller motta kollektiv arbeidsoppsigelse på Den norske kirkes vegne.*

3. Soknerådet vil sterkt støtte at det vert teke inn i Kyrkjelova §2 *Hvert sokn skal være betjent av prest,..* Då får ein slå fast at Den norske kyrkje skal vere ei landsdekkande kyrkje med presteteneste over heile landet, -også i dei grisgrendte strøka! Det bør understrekast at det skal kunne haldast gudstenester i kvart sokn, kyrkjemedlemmer skal ha tilgang til kyrkjelege handlingar, sjelesorg og trusopplæring slik at §1: *Lovens formål kan oppfyllest: Formålet med loven er å legge forholdene til rette for et aktivt engasjement og en stadig fornyelse i den evangelisk-lutherske folkekirke i Norge.*

4. Soknerådet vil og støtte Høyringsnotatet sitt framlegg om at det er i kyrkja og samfunnet si interesse at prestane tek vare på sine oppgåve på eit tilnærma uavhengig grunnlag, men forplikta på ordinasjonen og med eit personleg ansvar (jfr. ein viss likskap med helseføretakslova). Vi støttar framleggjet om at dette vert teke inn i Kyrkjelova §34: *All prestetjeneste skal reguleres slik at prestene kan uttøve sin teneste i samsvar med ordinasjonens forutsetninger og forpliktelser.*

5. Vi er usikre på om ei uavhengig klagenemnd er naudsynt. Nytt framlegg til KL § 27 med unntak av punkt b) er dekkande og nyttig for kyrkja! Disiplinærsaker bør bli handsama av ansvarleg, ikkje av eiga klagenemnd.

6. Når det gjeld finansieringa av Den norske kyrkja i framtida, er vi glade for at det framleis vert ei ansvarsdeling mellom stateleg og kommunalt. Vi har merka oss at staten har ca. 1/3 og kommunen ca. 2/3 av utgiftene til Den norske kyrkja. Utfordringa vert å få kommunane til framleis å sjå sitt ansvar for den lokale kyrkja ut frå §15 i kyrkelova. At departementet difor foreslår at departementet ikkje vil gje frå seg mynde til å gje reglar om budsjettordning, regnskapsføring og revisjon for sokneråda og fellesråda, for slik å få fram informasjonen om at §15 verkar etter Stortinget sin intensjon, trur vi er nødvendig. Men vi trur at endå sterkare verkemiddel trengst då vi ser at den lokale kyrkja ofte vert taparen i budsjettkampen. Øyremerking eller tydelegare føringar for kva som bør gå til den lokale kyrkja ved statlege overføringar til kommunen er nødvendige.

At tilskotet frå staten vert eit rammetilskot, er fornuftig. I framlegg til ny § 22 om statens økonomiske ansvar, er vi glade for at det er opning også for andre kyrkjelege formål enn tilskota til prestetenesta og verksemda på det regionale og nasjonale plan. Men diverre ligg prestedekninga pr. 1000 innbyggjarar/medlem langt under både den Svenske og Danske kyrkja på tross av dei mykje større geografiske avstandane vi har i Noreg. Dette bør rettast opp seinast ved overføringa!

7. I § 2 vert det sagt at det skal vere presteteneste i kvart sokn. Det står derimot ingenting om staten si plikt til å sikre trusopplæring for alle som ynskjer det. Gjennom trusopplæringsreforma har staten teke på seg å understøtte ei sentral kyrkjeleg oppgåve, noko som må seiast meir forpliktande i § 22.

8. Høyringsnotatet viser at det er mange justeringar og endringar som trengst ved ei verksemdoverdraging frå stat til ei sjølvstendig kyrkje. Viktig er det at arbeidstakarane kjenner seg ivaretekne i denne prosessen, og at dei ikkje må kome dårlegare ut med kyrkja som arbeidsgjevar. Dette har å gjere med rekrutteringa til kyrkjelege stillingar. Difor vonar vi at staten gjer sitt til å gje kyrkja den økonomiske plattformen som kyrkja treng for å oppfylle kyrkelova sitt føremål: *legge til rette for eit aktivt engasjement og ei stadig fornying i Den norske kyrkja!*

Rugsund, 21. oktober 2014

Kirsti Sørnes, sokneprest
Jon Rune Nygård
Bjørn Olsteg
Ole Myrhol Midtgulen sokn
leiar i Rupsund sokneråd
Pederleg Olsteg
Randi Myklebust
Ålfoten sokneråd;
Dillian F. Myklebust - Ålfoten sokneråd; leiar
Anne-Helene T. Myklebust, Ålfoten sokneråd
Noreun Eiminde Midtgulen sokneråd.
Coldbjerg Lassevili
Aud Bent Mulelid Midtgulen sokn leiar.